

Mid-Day Dogri News Bulletin, 05th April 2025

समे – 12:25

<><><><><><>

Prez Immigration

राष्ट्रपति द्रौपदी मुर्मु होरें इमिग्रेशन ते विदेशी नागरिकें सरबन्धी विधेयक-2025 गी मंजूरी देई दित्ती ऐ। विधेयक च भारत च विदेशी नागरिकें दे इमिग्रेशन, प्रवेश ते ठैहरने गी विनियमित करने दा प्रावधान ऐ। एह विधेयक, पासपोर्ट अधिनियम-1920, विदेशी पंजीकरण अधिनियम-1939, विदेशी अधिनियम-1946 ते इमिग्रेशन अधिनियम-2000 द थाहरै पर आहन्नेआ गेआ ऐ। इस विधेयक दा उद्देश्य इमिग्रेशन सरबन्धी कनूनें गी आधुनिक बनाना ऐ। इंदे च पासपोर्ट, यात्रा दस्तावेजें, वीजा ते पंजीकरण दे सरबन्धै च केंद्र सरकार गी किश अख्तियार देने दा बी प्रावधान ऐ। इस सरबन्धै च बड़े मते कानूनें दे गुंजल थमां बचने लेई गै एह इक कानून बनाया गेआ ऐ।

<><><><><><>

PM-Maritime Day

अज्ज राश्ट्री समुंद्री दिवस उप्पर प्रधानमंत्री नरेन्द्र मोदी होरें भारत दे समृद्ध समुंद्री इतिहास गी चेता कीता। सोशल मीडिया पोस्ट च इक वीडियो गी सांझा करदे होई मोदी होरें राश्ट्र निर्माण च समुंद्री क्षेत्र दी भूमिका उप्पर लोह पाई। उनें आखेआ जे सरकार भारत दी तरक्की लेई समुंद्री क्षेत्र ते बंदरगाहें गी मजबूती देना जारी रखोग।

<><><><><><>

CS-Bisag-N

शासन ते विकास लेई उभरदी तकनीकें दा सदुपयोग करने आली बक्खी इक बड्डी गैह पुट्टदे होई मुख सचिव अटल डुल्लू होरें कल केन्द्र शासत प्रदेश च सेंटर ऑफ एक्सीलेंस दी स्थापना लेई बास्कराचार्य नैशनल इंस्टीच्यूशन फॉर स्पेस एप्लीकेशन ते जियो इनफारमेटिक्स कन्नै सैह्योग उप्पर बचार करने लेइ इक उच्च स्तरीय बैठक दी अध्यक्षता कीती। इस बैठक च बास्कराचार्य नैशनल इंस्टीच्यूशन दे डरैक्टर जनरल टी.पी.सिंह ते स्पेशल डरैक्टर होरें हिस्सा लैता। बैठक च जम्मू कश्मीर च सेंटर ऑफ एक्सीलेंस दी प्रस्तावित संरचना उप्पर विस्तार कन्नै चर्चा कीती गई।

<><><><><><>

OSC

पिछले त्रऊं ब'रे दरान जम्मू कश्मीर च महिलाएं गी सुरक्षा ते सुविधा प्रदान कराने आले "वन स्टाप सेंटर" राएं घरेलू हिंसा दी शकार महिलाएं गी खूब सहायता उपलब्ध कराई गई ऐ। आकाशवाणी दे जम्मू संवाददाता नै महिला ते बाल विकास मंत्रालय आस्सेआ जारी आंकड़े मूजब 2021-22 दरान 1 ज्हार 544 महिलाएं गी इनें केन्द्रें च सुरक्षित आसरमा उपलब्ध कराया गेआ। जिसलै जे 2022-23 एह गिनतरी बधियै 2 ज्हार 482 होई गई ते ओहदे मगरा 2023-24 च एहदे च कमी दिक्खने च लब्बी ते घरेलू हिंसा थमां प्रभावत ते अपने बचाह लेई इनें केन्द्रें च औने आली महिलाएं दी गिनतरी 2 ज्हार 374 दर्ज कीती गई। ध्यानजोग ऐ जे वन स्टाप सेंटरें च ऐसी महिलाएं गी रौहने लेई थाहर उपलब्ध कराई जंदी ऐ, उंदी डाक्टरि इलाज मोआलजे दी सुविधा, कनूनी सहायता, पुलसै दी दख लते मदद ते मनोविज्ञानिक तौरा पर उंदी मदद मार्गदर्शन ते परामर्श दी सुविधा बी उपलब्ध होंदी ऐ। घरेलू हिंसा प्रभावत महिलां 5 दिनें तगर इनें केन्द्रें च रुकी सकदियां न ते किश मामले च एह अवधि बधाइयै 10 दिन बी कीती जाई सकदी ऐ ते जेकर लोड़ पवै तां जिला प्रशासन दी मंजूरी दे बाद इस अवधि गी होर बी बधाया जाई सकदा ऐ।

<><><><><><>

HEW

महिला ते बाल विकास मंत्रालय आस्सेआ जारी आंकड़े मूजब जम्मू कश्मीर च 28 ज्हार शा बद्ध महिलाएं गी भारत सरकार आस्सेआ चलाई गेदी महिलाएं दे सशक्तिकरण सरबंधी एचईडब्ल्यू स्कीम तैहत मदद हासल होई ऐ। आकाशवाणी जम्मू संवाददाता दी रिपोर्ट मूजब एचईडब्ल्यू पैहलकदमी, मिशन शक्ति प्रोग्राम दा इक हिस्सा ऐ जेहूदा मकसद महिलाएं गी कनूनी सहायता, माली साक्षरता कार्यक्रम ते सरकार दियां कल्याणकारी योजनाएं दा लाह ठोआने बारे जानकार बनाइयै सशक्त बनाना ऐ। इनें आंकड़े मताबक ब'रे 2022-23 च मदद हासल करने आलिए महिलाएं दी गिनतरी 17 ज्हार 110 ही जेहूड़ी 2023-24 च बधियै 24 ज्हार 574 होई गई।

<><><><><><>

AIIMS Jammu

सेहत ते परोआर कल्याण मंत्रालय नै लोकसभा च जानकारी दित्ती जे प्रधानमंत्री स्वास्थ्य सुरक्षा योजना तैहत जम्मू कश्मीर च 2 एम्स अस्पताल बनाए जा करदे न। आकाशवाणी दे जम्मू संवाददाता दी जानकारी मूजब मंत्रालय नै दस्सेआ जे जम्मू दे एम्स विजयपुर च 1 लक्ख 61 ज्हार 461 मरीजें दा इलाज कीता गेआ ऐ, जिसलै के कश्मीर च एम्स अवंतीपोरा दा अजें निर्माण कम्म जारी ऐ। मंत्रालय नै आखेआ जे एम्स विजयपुर लेई 19 अरब 63 करोड़ 54 लक्ख रपे आबंटित कीते गेदे न जिसलै के एम्स अवंतीपोरा लेई 21 अरब 60 करोड़ 84 लक्ख रपे। इनें प्रोजेक्टें दा कम्म सबूरा होना, केई मानकें पर निर्भर करदा ऐ जिंदे च प्रदेश सरकार आस्सेआ कब्जे कोला रहित जिमीं गी मुंतकिल करना, नियमन बारे मंजूरी ते इनें थाहरें दी हालात मूजब स्थिति बगैरा शामिल न। तोआइं मंत्रालय नै इब्बी जानकारी दित्ती ऐ जे पिछले 6एं ब'रें च जम्मू कश्मीर थमां 61 ज्हार 33 मरीज एम्स दिल्ली च दस्सने लेई आउट पेशेंट्स दे रपे च गे ते 7 ज्हार 882 मरीज उत्थें इलाज लेई दाखल होए।

<><><><><><>

Inter-Ministerial Study

भारत मनुक्खी वनजीव पर्यावरण इंटरफेयर उप्पर Zoonotic Spillover दे खतरे गी दूर करने लेई इक अग्रणी अंतर-मंत्रालय वैज्ञानिक अध्ययन शुरू करग। एह अनोखा अध्ययन पूरे सिक्किम, महाराष्ट्र ते तमिलनाडू च चुनिंदा पक्खरुएं दे अभयारण्य ते वैटलैंड च कीता जाग। जिस च मनुक्खी आबादी ते प्रवासी पक्खरुएं दी प्रजातिएं दी सेहत दी दिक्खभाल लेई वन हैल्थ एप्रोच दा फायदा लैता जाग। केन्द्री सेहत मंत्रालय नै आखेआ ऐ जे इस व्यापक शोध परियोजना दा मकसद पक्खरुएं दे अभयारण्य च कम्म करने आले ते कोल कच्छ रौहने आले लोकें च Zoonotic बमारिएं दा पता लाना ते उंदे निदान लेई रीयल टाइम दिक्ख-रिक्ख आला मॉडल तैआर करना ऐ।

<><><><><><>